

III. OBRANAN DI SPIRITU SANTU

Nos ya kaba a kontestá dos pregunta tokante Spiritu Santu: 1) Ken Spiritu Santu ta? (Naturalesa di Spiritu Santu) i 2) Kon Spiritu Santu ta yama? (Identidat di Spiritu Santu) Awor nos ke dirigí nos atenshon pa kontestá un otro pregunta: Kiko Spiritu Santu ta hasi? (Obranan di Spiritu Santu)

E sekshon aki ta basa riba loke nos a studia kaba di e naturalesa i identidat di Spiritu Santu. Pasobra E ta un persona, i pasobra E ta divino, p'esei E ta hasi e obranan ku un persona divino so por hasi!

Esaki ta e parti prinsipal di nos estudio. Den e sekshon aki, nos lo studia Spiritu Santu Su obranan den diferente época—den pasado, presente i futuro. Maske nos ta dividí e obranan di Spiritu Santu segun diferente era, nos tin ku kòrda ku e divishonnan aki ta artifisial. Tin ora, obranan ku Spiritu Santu ta hasi den un época ta kontinuá den un otro periodo di tempu. Maske esaki por trese sierto konfushon, en general nos ta kere ku e divishonnan aki por yuda nos komprendé e obranan di Spiritu Santu mas mihó.

A. OBRANAN DI SPIRITU SANTU DEN PASADO

Tin diferente obra ku Spiritu Santu a hasi den pasado. Den algun kaso, nos ta benefisiá di Su obra for di pasado te awendia. Laga nos mira algun di Su obranan:

1. Spiritu Santu i Kreashon

Tur tres miembro di Trinidad tabatin un parti den kreashon. Normal Dios Tata ta Esun ku Skritura ta indiká komo e Kreador. Ma Dios Yu i Dios Spiritu Santu tambe tin parti. Nos por nota esaki for di diferente teksto.

Gènesis 1:1 ta bisa “*Na prinsipio Dios a krea e shelunan i tera.*” E palabra ku ta usá pa Dios ta e palabra hebreo, ELOHIM—un palabra ku ta usá ku frekuensia pa ku Dios. Ma den e kaso aki, loke ta interesante ta ku e palabra ELOHIM ta plural en kontraste di otro usonan di e mésun palabra. Pues por tradusí e teksto, “na prinsipio Diosnan a krea”. Skritura klaramente ta siña monoteísmo (ún Dios so), rechasando redondamente tur forma di politeísmo (mas ku ún dios). Pues, esaki sigur no ta siña ku mas ku ún dios a krea tur kos. Ta parse ku esaki mas bien ta un referensia na e Trinidad divino.

Ta parse ku algun vèrsíkulo mas despues ta mustra dede den e mésun direkshon: “*E ora ei Dios a bisa: ‘Laga Nos traha hende segun Nos imagen, konforme Nos semehansa...’*” (1:26). Un biaha mas nos ta keda ku e interrogante: pakiko plural? Hopi teólogo ta haña ku esaki ta un referensia na e tres miembronan di e Trinidad.

Pues, si e dos tekstonan aki ta referí na e Trinidad divino, anto klaramente Spiritu Santu tabata aktivo den kreashon.

Ademas, Gènesis 1:2 ta laga sa ku Spiritu Santu tabata aktivo di un forma òf otro durante òf despues di kreashon. “*I tera tabata sin forma i bashi, i tabatin skuridat riba superfisio di e abismo. I e Spiritu di Dios tabata move riba superfisio di e awanan*”. E teksto aki ta guia na hopi spekulashon. Tin henter teoria tokante kreashon basá riba e teksto aki. Ta mas fásil pa bisa ku Spiritu Santu tabata aktivo, maske nos no por bisa ku siguridat kiko presis E tabata hasi.

Algun otro teksto por duna indikashon ku Spiritu Santu a hunga un ròl aktivo den

kreason. Eliú a bisa den Jòb 33:4, “*Ta e Spiritu di Dios a trahami, i e rosea di e Todopoderoso ta dunami bida.*” Segun Salmo 104:30, “*Bo a manda Bo Spiritu, nan a wòrdu kreá...*” Juan 6:63 ta bisa ku, “*Ta e Spiritu ta Esun ku ta duna bida...*” Segun Jòb 26:13, “*Pa medio di Su rosea El a dòrna e shelunan...*” E palabra “*rosea*” ta RUACH i por ta tradusí “*Spiritu*”. Ta méskos ku Salmo 33:6: “*Dor di e palabra di SEÑOR e shelunan a wòrdu trahá, i dor di e rosea di Su boka, henter nan ehèrsito.*”

2. Spiritu Santu den Era di Tèstament Bieu

Segun pensamentu di algun studiante di Beibel, Tèstament Bieu tabata era di Dios Tata, e Evangelionan tabata era di Dios Yu, i e era aktual ta periodo di Spiritu Santu. Esaki no ta un perspektiva totalmente korekto, pasobra tur tres miembro di e Trinidat tabata aktivo den tur era, maske den ún era, ministerio di un miembro di e Trinidat a destaká mas ku ministerio di e otro miembronan. Pues, Spiritu Santu tabata aktivo den era di Tèstament Bieu, maske e tabata diferente for di Su ministerio awor.

Den un sintido, nos por bisa ku e era di e Evangelionan ta pertenesé na e era di Tèstament Bieu, pasobra e era di lei a ekstendé te Pentekostes, ora Spiritu Santu a bin. Hesus a duna indikashon kla ku kos lo kambia ora Spiritu Santu ta bin (Juan 7:39; 14:17). Nos por hasi e pregunta, kon Spiritu Santu tabata obra den Tèstament Bieu i kon Su obra tabata diferente for di awor? Laga nos mira Spiritu Santu Su obra den Tèstament Bieu:

a. Spiritu Santu Su Obra pa ku Personanan

Nota promé ku algun teksto ta laga sa ku Spiritu Santu tabata *den* sierto persona: Jose (Gènesis 41:38); Josué (Numbernan 27:18); Ezekiel (Ezekiel 2:2; 3:24); Daniel (Daniel 4:8; 5:11-14; 6:3) i profetanan (1 Pedro 1:11).

Otro teksto ta duna di konosé ku Spiritu Santu a “*bin riba*” òf a “*baha riba*” sierto hende: Moisés (Numbernan 11:17); Balaam (Numbernan 24:2); Otoniel (Huesnan 3:10); Gideon (Huesnan 6:34); Jefe (Huesnan 11:29); Samson (Huesnan 14:6,19; 15:14); Saul (1 Samuel 10:6,10; 11:6; 19:23); mensaheronan di Saul (1 Samuel 19:20); David (1 Samuel 16:13); Amasai (1 Krónikanan 12:18); Azarias (2 Krónikanan 15:1); Jahaziel (2 Krónikanan 20:14); Zakarias (2 Krónikanan 24:20); Ezekiel (Ezekiel 11:5); Simeon (Lukas 2:25).

Tambe tin teksto ku ta bisa ku Spiritu Santu a *yena* sierto persona: Bezaleel (Eksodo 31:3; 35:31); Josué (Deuteronomio 34:9); Juan Boutista (Lukas 1:15); Elisabèt (Lukas 1:41); Zakarias (Lukas 1:67) i otronan no identifiká (Eksodo 28:3).

b. Pa ku Israel

Ma ta parse ku Spiritu Santu Su obra tabata dirigí mas tantu pa ku e *nashon* di Israel. Tèstament Bieu ta mensioná Spiritu Santu Su obra pa ku e lídernan polítiko i spiritual di e nashon di Israel (Moisés, Gideon, Samson, Saul, David, profetanan, èts). En kontraste, awendia ta parse ku Spiritu Santu ta obra mas tantu pa ku e *persona*.

Nos por hasi algun opservashon di Spiritu Santu Su obra den era di Tèstament Bieu. Pa di promé, ta parse ku Spiritu Santu no a *yena* òf habitá kreyentenan individual e tempu ei manera ta e kaso awor. Juan 14:17 ta duna impreshon ku Spiritu Santu tabata *ku* nan den e era promé ku Pentekostes, ma no a keda *den* nan. Tambe ta parse ku—en kontraste di awendia— Spiritu Santu a *yena* sierto persona so: Israel su lidernan, reinan, huesnan, profetanan, ekspertonan.

Un otro opservashon ta ku ta parse ku Spiritu Santu a *yena* òf bin riba un persona pa un sierto proposito i pa un sierto periodo di tempu. Por ehèmpel, Bezaleel tabata un eksperto ku Spiritu Santu a *yena* pa traha e tabernakulo huntu ku e muebelario i pertensianan. Spiritu Santu a *yena* Otoniel, Gideon, Jefe, i Samson pa derotá e enemigunan di Israel. Tambe Spiritu Santu a *yena* Saul i David pa goberná. Pues, ta parse ku den era di Tèstament Bieu, Spiritu Santu a *yena* e persona pa e kumpli ku e tarea ku Dios tabatin p’è!

Tambe ta parse ku ora e proposito a wòrdu kumpli, Spiritu Santu no a *yena* e persona mas òf a kita for di dje. Talbes Samson ta un bon ehèmpel di esaki. Skritura ta bisa diferente

biaha ku Spiritu Santu a *bin* riba dje (Huesnan 14:6,19; 15:14) pa un sierto proposito. Ta parse ku ora e proposito tabata kumpli, Spiritu Santu a bai. Spiritu Santu no tabata riba dje *tur ora!*

Spiritu Santu a wòrdu kitá di hende pa motibu di piká segun nos por nota. Den 1 Samuel 16:14, Spiritu Santu a bin riba Saul pa empoder'é pa goberná. Ma ora el a desobedesé Dios, Spiritu Santu a wòrdu kitá di dje. David su orashon di repintimentu despues di su piká di adulterio ku Bètsabé i asesinato di su esposo, Urias, ta duna un bista di esaki. Kòrdando loke a sosodé ku rei Saul, David a pidi Dios, “*No tirami for di Bo presensia, i no kita Bo Spiritu Santu for di mi*” (Salmo 51:11). Ta parse ku e obra di Spiritu Santu aki tabata relashoná ku servisio... no pa ku salbashon! Den e era awor, Spiritu Santu ta keda permanente den e kreyente. E kristian no ta pèrd'E una bes e ta biba den dje! Romanonan 8:9 ta bisa, “...*si un hende no tin e Spiritu di Cristo, e no ta pertenesé na djE.*”

3. Spiritu Santu i Hesu-Kristu

E Evangelionan ta papia hopi tokante Hesus Su relashon ku Spiritu Santu. Nos lo lista diferente punto relashoná ku esaki:

- Spiritu Santu a engendrá Hesus - Mateo 1:18,20; Lukas 1:35
- Spiritu Santu a baha riba Hesus - Mateo 3:16; Marko 1:10; Lukas 3:22; Juan 1:32,33
- Spiritu Santu a guia Hesus - Mateo 4:1; Marko 1:12; Lukas 4:1
- Spiritu Santu a yena Hesus - Lukas 4:1; Juan 3:34
- Spiritu Santu tabata riba Hesus - Lukas 4:18; Mateo 12:18; Juan 1:33 (“*keda*”); Echunan 10:38
- Spiritu Santu a ungi Hesus - Lukas 4:18; Echunan 10:38
- Spiritu Santu a enpoderá Hesus - Lukas 4:14; Echunan 10:38
- Hesus a saka demonio pa medio di Spiritu Santu - Mateo 12:28
- Hesus a alegrá den Spiritu Santu - Lukas 10:21
- Hesus a duna Spiritu Santu na hende - Juan 20:22
- Hesus a pidi e Tata pa manda Spiritu Santu - Juan 14:16,26; 15:26; 16:7; Lukas 24:49; Echunan 2:33
- Hesus a ofresé Su mes komo un sakrifisio pa medio di Spiritu Santu - Hebreonan 9:14
- Hesus a wòrdu resusitá pa medio di Spiritu Santu - Romanonan 1:4; 8:11; 1 Pedro 3:18
- Hesus a duna mandamentu pa medio di Spiritu Santu - Echunan 1:2
- Spiritu Santu ta glorifiká Hesus - Juan 16:14

Ta di suma importansia pa kòrda ku Spiritu Santu a bin pa glorifiká Kristu. Ora un kreyente ta bishitá un iglesia pa promé biaha, ta importante pa e studia kredo di iglesia—nan perspektiva doktrinal. Awendia sigur un punto importante pa opservá ta e importansia ku e grupo ta pone riba Spiritu Santu. Den algun iglesia kristian, kasi lo bo kere tin dos miembro so di e Trinidad, pasobra nan ta papia solamente di Dios Tata i Dios Yu. Esei no ta korekto. Ma di otro banda, tin iglesia ku bo lo kere tin solamente ún miembro divino den e Trinidad, esta Spiritu Santu. Tur kos ta Spiritu Santu. Esaki tampoko no ta korekto. Spiritu Santu a bin pa glorifiká i halsa Hesu-Kristu—no Su mes (Juan 16:14)!

Un otro punto ku nos por siña for di Hesus Su relashon ku Spiritu Santu ta lo siguiente: Si Hesus—siendo Dios mes—a skohe pa no biba isolá di Spiritu Santu, kuantu mas abo i ami tin mester di e obra di e Spiritu presioso pa ku nos bida kristian?

4. Spiritu Santu i Pentekostes

Dios Tata ta omnipresente—E ta tur kaminda. Ma tòg nos konosE komo “*nos Tata ku ta den shelu*” (Mateo 6:9). Dios Yu ta omnipresente. Ma Skritura ta bisa nos ku aworaki E ta sinta na man drechi di Dios Tata. Spiritu Santu tambe ta omnipresente. Ma na Pentekostes El a

bin den mundu na un manera spesial (Echunan 2:1-21).

Hesus a duna Su siguidónan instrukshon kla: “*Mi ta manda e promesa di Mi Tata riba boso; ma boso mester keda den e stat Jerusalèm te ora boso wòrdu bistí ku poder for di ariba*” (Lukas 24:49). Nan a obedesé Hesus Su instrukshon i a keda na Herusalèm, haciendo orashon, wardando pa binida di Spiritu Santu. Nan no a kuminsá ministerio te ora nan a risibí Spiritu Santu. Ora e Spiritu a bin riba dia di Pentekostes, iglesia a wòrdu formá. E komunidad kristian tabata karakterisá pa e obra di Spiritu Santu den e buki di Echunan.

Nos por siña algu for di esaki. E kreyente tin Spiritu Santu ya kaba. Ma nos no mester purba ministrá sin ta yená ku Spiritu Santu. Nos tendensia humano ta pa sirbi Señor dor di esfuerso propio, karnal. Ma méskos ku Spiritu Santu a karakterisá e komunidad kristian den e buki di Echunanun, Su obra den i dor di kreyentenan mester karakterisá nos awendia!

5. Spiritu Santu i Skritura

Kiko tabata Spiritu Santu Su obra pa ku Skritura? Klaramente E tabata Outor di Skritura. Dos Pedro 1:20-21 ta bisa, “*Ma komprendé esaki promé ku tur kos, ku ningun profesia di Skritura no ta un asunto di interpretashon personal, pasobra nunca profesia no a wòrdu duná pa medio di e boluntat di hende, ma hòmbenan santu di Dios a papia, inspirá dor di Spiritu Santu.*”

Pedro i e otro apòstelnan tabata konvensí ku Beibel no tabata un invenshon di hende. Nan no tabatin duda ku Spiritu Santu tabata Outor di Skritura! Por ehèmpel, Pedro, den Echunan 1:16 a referí na algu ku David a bisa—ma e ta insistí ku David a papia pa medio di Spiritu Santu. Pablo a hasi méskos pa ku Isaias. Den Echunan 28:25-27, el a sita Isaias i a bisa ku “*Spiritu Santu a papia pa medio di profeta Isaias*”. Outor di e buki di Hebreonan tambe a sita tekstonan den Tèstament Bieu i a bisa ku esaki ta loke Spiritu Santu a papia (3:7; 10:15).

Ma Spiritu Santu no solamente a inspirá Skritura. E tambe ta interpretá Skritura. Pues, E ta tantu Outor komo Interpretadó di Skritura. Ta parse ku Hesus tabata papia spesífikamente ku e apòstelnan—bisando loke Spiritu Santu lo hasi pa ku nan—ora El a bisa, “*E lo glorifikáMi, pasobra E lo tuma for di loke ta di Mi, i lo revelá esaki na boso...E lo tuma for di loke ta di Mi i lo revelá esaki na boso*” (Juan 16:14-15). Pablo tambe a skirbi den 1 Korintionan 2:12-13, “*Awor nos a risibí, no e spiritu di mundu, sino e Spiritu ku ta bin di Dios, pa nos konosé e kosnan ku Dios a duna nos gratuitamente, kosnan ku nos tambe ta papia, no ku palabranan siña dor di sabiduria di hende, ma ku palabranan siña dor di e Spiritu, kombinando pensamentunan spiritual ku palabranan spiritual.*” Mira tambe 1 Juan 2:20,27 i Efesionan 1:17.

Esei ta obranan di Spiritu Santu prinsipalmente den pasado. Klaramente E tabata aktivo den e era di Tèstament Bieu. Ma kiko di e era aktual?

B. OBRANAN DI SPIRITU SANTU PRESENTE

Awor nos ke kuminsá pensa tokante Spiritu Santu Su obranan den e tempu aktual. Nos lo kuminsá ku Su obra den hende sin Kristu i despues studia Su ministerio pa ku kreyentenan.

1. Promé ku Salbashon

Un hende sin Kristu no tin Spiritu Santu (Romanonan 8:9; Judas 19). Ma Spiritu Santu ta obra den kurason i bida di e inkomberso p’è konfia den Hesu-Kristu komo su Salvador. Kiko presis Spiritu Santu ta hasi pa ku e persona sin Kristu?

a. Spiritu Santu ta konvensé e inkomberso

Hesus, papiando di Spiritu Santu a bisa, “*I E, ora ku E bin, lo kombensé mundu di piká, i di hustisia i di huisio; di piká, pasobra nan no ta kere den Mi; di hustisia, pasobra Mi ta bai serka e Tata, i boso no ta miraMi mas; i di huisio, pasobra e prens di mundu aki a wòrdu huzgá*” (Juan 16:8-11). Hesus a indiká ku Spiritu Santu lo konvensé mundu di tres kos:

Pa di promé, Spiritu Santu lo konvensé mundu di piká. E palabra “piká” ta singular. Probabelmente E ta referí spesífikamente na e piká di inkredulidat. Esei ta e ún piká

ku ta separá e persona sin Kristu for di salbashon. Ora un kristian ta kompartí Palabra di Dios ku un persona sin Kristu, Spiritu Santu lo usa esei pa konvens'è di piká. Dios ta usa loke e kreyente ta kompartí, ma e poder pa konvensé di piká ta bin di Spiritu Santu!

Na di dos lugá, Spiritu Santu ta konvensé mundu di hustisia i rektitut. E ta konsientisá e pekadó ku Dios ta hustu i ta eksigí hustisia perfekto pa hende por yega den Su presensia. E tambe ta konvensé e pekadó ku su mes obranan no por produsí e santidat i hustisia nesario pa salbashon. Esaki ta esensial pasobra hopi hende ta satesfecho ku nan propio bondat—keriendo ku nan ta sufisiente hustu. Talbes nan ta mira e faltanan i pikánan di otro hende ma nan no ta wak nan mes pikánan! Nan ta ignorante di e echu ku nan nunca por ta suficiente rekto pa drenta Dios Su presensia. Spiritu Santu tambe ta konvensé e pekadó ku ta solamente e hustisia perfekto di Kristu Hesus ku por duna nan entrada serka Dios, i ku e por haña esaki solamente pa medio di fe. (Nos tambe por agregá ku Spiritu Santu ta hasi e mesun obra aki den bida di e kreyente...konvensiendo e kristian ora e ta hasi piká.)

Pa di tres, Spiritu Santu ta konvensé mundu di huisio. Satanas ya kaba a wòrdu huzgá i derotá. Esnan ku no ta aseptá e hustisia di Dios lo wòrdu huzgá tambe. Ora Pablo a presentá su kaso dilanti di Felix, Spiritu Santu a hasi e obra ei den bida di e gobernadó: *“I ora ku e tabata papia tokante di hustisia, dominio propio i huisio ku ta bin, Felix a spanta...”* ma e no a kombertí (Echunan 24:25).

b. Spiritu Santu ta hala e inkomberso

Ningun hende sin Kristu ta bin serka djE solamente di su propio boluntat. Dios ta obra den kurason di e persona inkomberso i ta dun'é e deseo pa bin na Kristu. E lo no bin di su propio boluntat, si Dios no ta hal'é. Hesus a bisa, *“Ni un hende no por bin serka Mi, si no ta e Tata ku a manda Mi a hal'é”* (Juan 6:44). Maske ningun teksto ta indiká ku esaki ta Spiritu Santu Su obra, ta parse ku esei lo ta un parti di Su ministerio, pasobra e di dos miembro di e Trinidad tambe ta hala hende (Juan 12:32). Si e Tata i Yu ta hasié, kasi sigur Spiritu Santu tambe tin parti den e ministerio aki den bida di e persona sin Kristu.

c. Spiritu Santu ta invitá e inkomberso

Segun Revelashon 22:17, *“I e Spiritu i e bruit ta bisa: ‘Bin.’ I laga esun ku tende, bisa; ‘Bin,’ I laga esun ku tin set, bin; laga esun ku kier tuma e awa di bida pòrnada.”*

Ta importante pa kòrda den nos tèstifikamentu ku nos mester presentá e plan di salbashon asina kla i komprendíbel ku nos por i na mésun tempu konfia Spiritu Santu pa obra. Tur dos banda ta di suma importansia! Nos ta kapas pa lubidá Spiritu Santu den testifikamentu. Hopi biaha nos ta muchu pura pa un hende “hasi un desishon pa Kristu.” Spiritu Santu no ta pura e hende pa “hasi un desishon.” E ta warda i obra ku pasenshi! Djis pasobra e persona no a hasi un desishon, esei no ke men ku Spiritu Santu no ta obra. Nos mester planta e simia di Palabra di Dios, anto tene pasenshi, konfiando Spiritu Santu pa hasi Su obra tambe. Esaki tambe ta un spièrtamentu pa nos hasi orashon pa hende sin Kristu. Kombertimentu ta un obra ku Dios so por hasi. Nos ta hasi orashon i Spiritu Santu ta obra—obrando e milager ku ta transladá un persona for di famia di Satanas pa famia di Dios!

2. Na Momentu di Salbashon

Spiritu Santu ta obra den e persona promé, na momentu di, i despues ku e persona aseptá Kristu. E distinshon den tempu ta artifisial, pero por yuda nos komprendé. Nos ke dirigí nos atenshon na loke Spiritu Santu ta hasi na momentu di salbashon. Skritura ta menshoná hopi obra ku E ta hasi na momentu di salbashon.

a. Regenerashon

E palabra *“regenerashon”* (PALIGGENESIA na idioma griego) ta usá dos biaha den Beibel Santu (Mateo 19:28; Tito 3:5). Den Mateo 19:28, e palabra ta usá na un forma eskatológiko, pues no ta regard salbashon. Tito 3:5 ta e úniko biaha ku Skritura ta usa e palabra den e konteksto di salbashon: *“El a salba nos, no a base di obranan ku nos a hasi den hustisia, ma segun Su miserikòrdia, pa medio di e labamentu di regenerashon i renobashon pa medio di Spiritu Santu.”*

Nos ke hasi diferente opservashon tokante regenerashon. Pa di promé nos ke pensa tokante un definishon di regenerashon. E palabra griego, PALIGGENESIA ta formá di dos otro palabra griego. PALIN ta nifiká “atrobe” huntu ku GENESIS, nifikando fuente, origen, òf nase. Den Juan 3:3, Hesus a bisa “...*si un hende no nase di nobo, e no por mira e reino di Dios*”. Literalmente e teksto ta bisa “nase di ariba”, i esaki probabelmente ta inkluí den e idea di regenerashon.

Teólogonan ta usa e palabra “regenerashon” pa referí na bida nobo, nase di nobo, resurekshon spiritual, kreashon nobo, e bida nobo sobrenatural ku e pekadó ta risibí ora e ta bira un yu di Dios. Regenerashon ta referí na bida etèrno ku e pekadó ta haña na momentu ku e ta konfia den Kristu pa medio di fe—e kambio for di morto spiritual pa bida spiritual.

Pues, nos por definí regenerashon komo e akto soberano di Dios pa medio di kual E ta duna bida nobo (spiritual i etèrno) na esun ku ta spiritualmente morto ma ku awor ta kere. Òf nos por bisa simpelmente ku e ta nifiká “pa nase di nobo”.

Komo resultado di regenerashon, e persona ta bira un yu legitimo di Dios i ta forma parti di famia di Dios (Romanonan 8:15; Galationan 4:6; Efesionan 2:19; 3:15; 5:1). E tambe ta bira erederò di Dios i ko-erederò ku Hesus (Romanonan 8:16-17; 1 Pedro 1:4).

Por bisa ku tres figura ta usá den Beibel pa komuniká e doktrina di regenerashon: a) nase di nobo (Juan 3:3-8; 1:13), b) resurekshon spiritual (Romanonan 6:13; Efesionan 2:5) i c) kreashon nobo (2 Korintionan 5:17; Efesionan 4:24).

E di dos opservashon ku nos ke hasi tokante regenerashon ta e nesesidat di regenerashon. Tur hende ta nase den famia di Satanas (Juan 8:44 – “*Boso ta di boso tata, e diabel*”; 1 Juan 3:10; Echunan 13:10 – “*yunan di diabel*”; Mateo 13:38 – “*yunan di e malbado*”; Efesionan 2:2-3 – “*yunan di desobedensia*”, “*yunan di furia*”); Mateo 23:15 – “*yu di fièrnu*”; Lukas 16:8 – “*yunan di e siglo aki*”). Komo resultado, tur hende ta pekadó. Ningun pekadó no por tin komunión ku Dios; ningun hende no por mira Dios sin santidat (Hebreonan 12:14). Pa un hende por tin un relashon personal ku Dios, e mester nase den famia di Dios. I esei ta presis loke regenerashon ta trata kun’è.

Un di tres opservashon ta e medio di regenerashon. Kon regenerashon ta tuma lugá? a) E ta un obra di Dios (Juan 1:13; Tito 3:5; Echunan 16:14; Romanonan 9:16; Filipensenan 2:13). b) E ta un obra konforme boluntat di Dios (Santiago 1:18; Juan 1:13). c) E ta un obra di Dios pa medio di Spiritu Santu

Segun Skritura, tur tres persona di e Trinidad ta aktivo den regenerashon: e Tata (Santiago 1:17-18) i e Yu (Juan 5:21; 1 Juan 5:12). Ma ta parse ku Spiritu Santu ta Esun ku spesífikamente ta regenerá (Juan 3:3-8; Tito 3:5; Juan 6:63). Spiritu Santu ta Esun ku ta duna bida. Talbes e nasementu di Hesus ta ilustrá esaki bon. Dios ta e Tata i Hesus ta e Yu. Ma tabata Spiritu Santu ku a engendrá e Yu. Méskos ku Hesus a wòrdu engendrá dor di Spiritu Santu, ta similar ku kada persona ku ke ta un yu di Dios mester nase di Spiritu Santu!

Tambe d) regenerashon ta un obra di Dios na momentu ku un persona ta konfia den Kristu Hesus (Juan 1:12; Galationan 3:26; Juan 3:14-16). Fe ta e rekisito humano pa Spiritu por regenerá.

Segun doktrina reformá, un persona mester ta regenerá promé ku e por kere—e pekadó mester haña bida nobo pa e por kere. Maske tin siertu bèrdat den esei, tin problema ku e pensamentu aki. Si un persona ta regenerá, e no tin nodi di kere. Ya kaba e ta regenerá! Ta mihó pa bisa ku fe i regenerashon ta tuma lugá na e mesun tempu. Fe ta tantu un eksigensia pa salbashon (Echunan 16:31) komo un regalo di Dios pa salbashon (Efesionan 2:8-9).

I e) regenerashon ta un obra di Dios ora e persona ta kere e evangelio revelá den Palabra di Dios (1 Pedro 1:3,23; 1 Juan 5:1).

E di kwater opservashon ta karakteristikanan di regenerashon. a) Regenerashon ta instantaneo. E no ta un proseso. Na mésun momentu ku e pekadó ta kere, e ta regenerá! b) E ta un obra sobrenatural. Regenerashon no ta algu ku hende por hasi (Juan 3:6-7). Ningun hende por hasi su mes un yu di Dios. Dios *so* por hasi e transformashon ei—for di yu di Satanas pa yu di Dios (Juan 1:12-13).

Regnerashon sigur no ta a base di kualke obra di hende...por ehèmpel, dor di boutismo di awa (manera diferente religion ta kere)! Klaramente Cornelio tabata regenerá promé ku el a batisá (Echunan 10:47). Regnerashon ta totalmente un akto sobrenatural di Dios!

E di sinku opservashon di regenerashon ta e resultatonan di regenerashon. Kiko regenerashon ta produsí? a) Bida nobo (Efesionan 2:5). Sin bida nobo den Kristu, ta impusíbel pa gosa e otro benefisionan di salbashon! b) Naturalesa nobo (2 Korintionan 5:17; Efesionan 4:24). E naturalesa nobo por resultá den un kambio dramátiko den bida di e kreyente nobo den su aktitut pa ku Dios i viktoria riba piká, pasobra awor e tin e naturalesa di Dios mes!

Un otro resultado di regenerashon ta c) Fruta. Nos por mira esaki for di diferente ángulo. E fruta por ta demonstrá dor di viktoria riba piká. Segun 1 Juan 2:29, e ta “*praktiká hustisia*” òf 1 Juan 3:9, e “*no ta praktiká piká*”. Tambe 1 Juan 5:18 ta bisa ku e “*no ta hasi piká*”. E tekstonan aki no ta nifiká ku e no por hasi piká mes mas! Nan ke men ku e persona regenerá ta praktiká rektitut komo un hábito di su bida. Un otro teksto ta bisa ku el a “*vense mundu*” (1 Juan 5:4).

Fruta, mirá di un otro ángulo, por ta stimashon. Segun 1 Juan 4:7 e kreyente ku ta “*stima otro...konosé Dios*”. E tin stimashon pa Dios (1 Juan 5:1-2). Asta e ta stima su enemigunan (Mateo 5:44-45).

E tambe ta gosa un relashon personal ku Dios Tata. E Tata ta protehé di maldat (1 Juan 5:18) i ta proveé pé (Mateo 7:11; Lukas 11:13).

Por argumentá adishonal ku regenerashon ta e fundeshi riba kua “siguridat etèrno” ta basá...e kreensia ku un kreyente no por pèrdè su salbashon. Ora e persona ta konfia den Hesu-Kristu komo su Salbador, e ta nase den famia di Dios. E no por stòp di ta un yu di Dios. E tin bida etèrno, maske kiko ku e ta hasi. E doktrina aki ta basá riba e echu ku salbashon ta totalmente un obra di Dios—nada di hende.

b. Boutismo

Tin hopi konfushon awendia relashoná ku e obra aki di Spiritu Santu. Kiko presis ta e boutismo di Spiritu Santu?

Pentekostalismo tradishonal ta siña ku esaki ta un evento ku ta normalmente distinto di i despues di salbashon. Nan ta konsider’é e “segunda obra di grasía”. (E promé obra di grasía ta salbashon.) E ta spliká asina: Ora bo ta kombertí bo ta risibí e boutismo di Kristu. Despues di salbashon, bo mester eksperensia e boutismo di Spiritu Santu! Ademas, pentekostalismo tradishonal ta siña ku e indikashon inisial ku e boutismo di Spiritu Santu a sosodé ta papiamentu na lenga straño. I segun nan, e boutismo di Spiritu Santu ta un eksperensia ku e kristian mester buska pa e por haña. Kon bo mester busk’é òf hañ’é? Pentekostalnan no ta di akuerdo riba e punto aki. Algun ta di opinion ku e kreyente mester busk’é dor di aktonan di obediensia, òf dor di orashon, bandoná tur kos, umildat, repentimentu, purifiká bo mes, un bida sin piká, spera, entrega, hasi bo mes bashi, kere, konsagrashon total, èts.

Si un pentekostal ta hasíbo pregunta si bo a risibí e boutismo di Spiritu, kiko lo bo bis’é? Kiko ta e boutismo ku Spiritu i ki tempu e ta sosodé?

Boutismo ku Spiritu Santu no ta mensioná den Tèstament Bieu. Den e Evangelionan e ta hañá den Mateo 3:11; Marko 1:8; Lukas 3:16; Juan 1:33. Den e tekstonan aki ta obvio ku e boutismo ku Spiritu Santu ta algu futuro, pasobra Juan Boutista tabata profetisá tokante e boutismo aki ku tin ku sosodé ainda. Asta den Echunan 1:5, Hesus a bisa Su apòstelnan ku esaki ta algu den futuro aida, ma dentro di algun dia: “*...ma boso lo wòrdu batisá ku Spiritu Santu no muchu dia despues di e dia aki.*”

E siguiente biaha ku e boutismo ku Spiritu Santu ta mensioná ta den Echunan 11:15-17, unda Pedro a reportá loke a sosodé na kas di Cornelio. El a bisa, “*...ora mi a kuminsá papia, Spiritu Santu a baha riba nan, meskos ku El a baha riba nos den prinsipio. I mi a kòrda e palabra di Señor, kon El a bisa: ‘Juan tabata batisá ku awa, ma boso lo wòrdu batisá ku Spiritu Santu.’ ...Dios anto a duna nan e mesun don ku El a duna nos tambe despues di a kere den Señor Jesu-Cristo...*” Pedro a bisa ku loke a sosodé na kas di Cornelio tabata identiko ku loke

nan a eksperensiá dia di pentekostes. Nos por bisa ku tantu loke a sosodé na pentekostes i na kas di Cornelio tabata kumplimentu di e profesianan.

Ku e trasfondo bíblico ei, nos por purba kontestá e preguntanan tokante e boutismo ku Spiritu Santu. Kiko ta e boutismo ku Spiritu Santu? Ki tempu e boutismo ku Spiritu Santu ta sosodé?

Nos por definí e boutismo ku Spiritu Santu komo e obra di Spiritu Santu na momentu di salbashon ku ta introdusí e persona den e kurpa di Kristu. Diferente teksto ta muestra den e direkshon aki. Segun Romanonan 6:3-4, “...*boso no sa ku nos tur ku a wòrdu batisá den Cristo Jesus a wòrdu batisá den Su morto? Pesei nos a wòrdu derá huntu kunE dor di boutismo den morto, pa meskos ku Cristo a wòrdu lantá for di e mortonan dor di e gloria di e Tata, nos tambe por kana den nobedat di bida.*” Galationan 3:27 ta bisa “*Pasobra boso tur, ku a wòrdu batisá den Cristo, a bisti boso mes ku Cristo.*” Efesionan 4:5 ta mensioná e “*ún boutismo*” ku tur kreyente ya kaba a eksperensiá. I Kolosensenan 2:12 ta bisa, “*siendo derá kunE den boutismo, den kual boso a wòrdu lantá tambe huntu kunE dor di fe den e poder di Dios...*”

E boutismo deskribí den e tekstonan aki no ta boutismo di awa. Di bèrdat, boutismo di awe ta simbóliko di boutismo ku Spiritu Santu. Boutismo di awa ta simbolisá un boutismo ku ya kaba a sosodé den e kreyente. Ora Kristu a muri riba krus di Kalvario, El a tuma nos lugá. El a muri komo nos representante. Pues, nos a muri huntu kunE. Ora Kristu a wòrdu derá, nos a wòrdu derá huntu kunE. Ora El a resustí, nos a resustitá huntu kunE. Tur esaki ta sosodé simbólikamente na salbashon.

Ma 1 Korintionan 12:13 ta mas kla ainda: “*Pasobra pa medio di ún Spiritu nos tur a wòrdu batisá den ún kurpa, sea hudiu òf griego, sea esklabu òf liber, i na nos tur a wòrdu duná di bebe di ún Spiritu.*” Laga nos wak e teksto aki mas djaserka.

E palabranan “*pa medio di*” ta e palabra griego EN. EN ta nifiká “*pa medio di*” òf “*ku*”. E palabra griego EN no por ta tradusí “*di*”. Pues, ora pentekostalnan ta bisa “*boutismo di Spiritu Santu*”, nan tin e nòmber robes. Esaki ta importante, pasobra Spiritu Santu no ta Esun ku ta batisá. E Spiritu ta e medio. Kristu ta Esun ku ta boutisa—nunka Spiritu. Riba dia di pentekostes, Pedro a bisa, “*Pesei, siendo halsá na man drechi di Dios i despues di a risibí for di e Tata e promesa di Spiritu Santu, El a drama esaki, lokual boso ta mira i tende*” (Echunan 2:33). E Tata a duna Spiritu Santu. Ma tabata Hesus glorifiká ku a “*drama*” Spiritu Santu.

Ki tempu e boutismo pa medio di Spiritu sosodé? Klaramente esaki ta sosodé na salbashon. Ki evidensia tin pa esaki? Ún Korintionan 12:13 ta presentá sikiera tres argumento ku e boutismo pe medio di Spiritu Santu ta sosodé na salbashon:

E promé evidensia ta ku tur kreyente ta partisipá den boutismo ku Spiritu. Ripará ku e teksto ta bisa, “*nos tur*”, indikando tur kreyente. Pa no tin bruhashon kiko “*nos tur*” ta nifiká, Pablo, inspirá pa Spiritu Santu a skirbi, “*nos tur...sea hudiu òf griego, sea esklabu òf liber...nos tur*”. Den otro palabra, no tin eksepshon! Dios no ta hasi distinsjon di nashonalidat òf rasa. No tin distinsjon den status sosial. Tampoko no tin distinsjon den edat, género, spiritualidat, puesto den iglesia, èts. Tur kreyente—sin eksepshon—tin ún kos en komún—salbashon. Si boutismo ku Spiritu Santu a sosodé na boutismo ku awa, òf ora e kreyente ta papia na lenga straño, òf ora e tin un sierto eksperensia, òf ora e ta dediká su mes mas na Señor, èts., e ora ei Pablo no por a skirbi “*nos tur*”, pasobra no tur kristian a eksperensiá esei ainda!

Un otro evidensia ta ku tur kreyente a partisipá den e boutismo ku Spiritu den pasado. Ripará e palabranan di 1 Korintionan 12:13 atrobe. E teksto ta usa e palabranan, “*a wòrdu*”. Pablo no a skirbi “*lo wòrdu*” òf “*por wòrdu*”. Esaki klaramente ta un evento ku a sosodé den pasado. Segun doktrina pentekostal, e boutismo di Spiritu Santu ta un eksperensia ku e kreyente tin ku buska pa e por eksperensie. Esei ta inkorekto! Tur kreyente a haña e boutismo ku Spiritu Santu kaba! E úniko manera ku esei por ta e kaso ta si e ta sosodé na momento di salbashon. Sea ku un persona a konfia den Kristu pa salbashon 30 aña pasá òf 30 sekòndu pasá, tur dos ya kaba a wòrdu batisá pa medio di Spiritu!

E di tres evidensia ta ku boutismo ta algu ku ta sosodé na komienso di un bida nobo. Segun 1 Korintionan 12:13, “*...nos tur a wòrdu batisá den ún kurpa...*” Ki tempu

boutismo ta tuma lugá? Juan Boutista a batisá esnan ku repentí. Den su kaso, el a batisá e persona ku a repentí i tabata kuminsá un bida nobo. Hudiunan a batisá esun ku ke bira hudiú. E proseso normal pa bira un hudiú tabata: instrukshon, sirkunsishon, boutismo. Den kaso di hudiunan, boutismo a indiká un status òf bida nobo. Igualmente, ora un hende ta kombertí na Kristu, boutismo ku awa ta sigui. Esaki ta algu ku mester sosodé na komienso di bida nobo. Pues, boutismo ta algu ku ta sosodé na komienso di un bida nobo. Lògikamente, boutismo ku Spiritu Santu ta sosodé na komienso di bida nobo den Kristu...na momentu di salbashon!

Ta visto tambe ku nunca Skritura ta duna mandamentu pa un kristian wòrdu boutisá ku Spiritu Santu. Si esaki tabata algu ku Dios a deseá pa e kristian hasi despues di salbashon, sigur lo tabatin instrukshon den Beibel pa kreyentenan hasi esei. Ma no tin instrukshon asina den Beibel...pasobra ya kaba e kreyente ta batisá ku Spiritu Santu!

Kiko ta proposito di e boutismo ku Spiritu Santu? E boutismo ku Spiritu Santu ta inkorporá e kristian nobo den e kurpa di Kristu. Si e boutismo no ta sosodé na salbashon, anto lo tin kreyente ku no ta pertenesé na e kurpa di Kristu.

Tambe ta bon pa mensioná ku tin siñansa pentekostal mas resien ku ta bisa ku tin dos boutismo relashoná ku Spiritu Santu. Ún boutismo *pa medio di* Spiritu i ún otro boutismo *den* Spiritu. Ma Efesionan 4:5 ta klaria esaki bon dor di bisa ku tin solamente e “*ún boutismo*”!

c. Habitashon

Spiritu Santu no ta regenerá i batisá un persona anto bandon'é. E ta keda biba den e kreyente. Hesus a primintí esaki promé ku El a wòrdu krusifiká. Den Juan 14:16-17, El a bisa, *“I lo Mi pidi e Tata, i E lo duna boso un otro Konsolador, pa E keda serka boso pa semper, esta, e Spiritu di bèrdat, Kende e mundu no por risibí, pasobra e no ta mir'E ni konos'E, ma boso konos'E pasobra E ta biba serka boso i lo ta den boso.”* Hesus a laga sa ku E tabata huntu ku nan...ma E ta bai. Awor Spiritu Santu lo bin biba *den* nan.

E siguiente tekstonan ta mensioná ku Spiritu Santu ta habitá e kreyente: Juan 7:37-39; 14:17; Romanonan 5:5; 8:9,11; 1 Korintionan 2:12; 3:16; 6:19; Galationan 3:2; 1 Juan 3:24. Ademas, Pablo ta komuniká e doktrina aki ku e verbo OIKEO (biba) i tambe e preposishon EN (den).

Ken ta esnan ku ta Spiritu Santu ta biba aden? Spiritu ta un regalo di Dios na tur kreyente. E ta bin biba den tur kreyente. E no ta selektá algun i ignorá otro nan. Evidensia di esaki ta ku Spiritu Santu ta yamá un “regalo” (Romanonan 5:5; 2 Korintionan 5:5; 1 Juan 4:13). Un regalo no ta dependé di bondat òf mérito di e respiciente. Un otro evidensia ta ku Spiritu Santu asta ta den kreyentenan ku ta hasi piká. Den 1 Korintionan 3:16 i 6:19, Pablo a skirbi, *“Of boso no sa ku boso kurpa ta e tèmpe di Spiritu Santu, Kende ta den boso, Kende boso tin di Dios, i ku boso no ta pertenesé na boso mes?”* Den e konteksto, kapítulon 5-6, Pablo a skirbi tokante un persona den iglesia ku tabata hiba un bida di piká. Aki den 6:19, e no a hasi distinshon entre kreyentenan ku a aktua karnal, bisando ku solamente kreyentenan spiritual ta habitá. Pablo a usa e habitashon di Spiritu Santu komo argumento pa hiba un bida santu. Piká sigur ta afektá e efektivitat di Spiritu Santu den bida di e kreyente, ma e no ta kita Su presensia.

Beibel ta indiká kla ku un persona ku no tin Spiritu Santu no ta salba. Un teksto klave tokante Spiritu Santu bibando den e kreyente ta Romanonan 8:9: *“...boso no ta den karni, sino den e Spiritu, si di bèrdat e Spiritu di Dios ta biba den boso. Ma si un hende no tin e Spiritu di Cristo, e no ta pertenesé na djE.”* E último frase ta kategórik. No ta eksistí kristian sin Spiritu Santu. Judas 19 i 1 Korintionan 2:14 ta laga sa ku e hende ku no ta spiritual, no tin Spiritu Santu, pues no ta salbá. No ta importá kon nobo, kon debil, kon imperfekto, kon inmaduru un kreyente ta...tòg Spiritu Santu ta biba den dje!

Ta pusíbel ku Spiritu Santu ta stòp di biba den un kristian? Su habitashon ta permanente. Ta pusíbel pa pèrdè e yenamentu ku Spiritu Santu, ma no ta pusíbel pa e kreyente genuino pèrdè e habitashon di Spiritu Santu (Juan 14:16). Segun Romanonan 8:9, si Spiritu ta bandoná e kreyente—no ta den e persona—e no ta salbá!

Laga nos pensa tokante algun problema relashoná ku e doktrina di e habitashon di

Spiritu Santu. Algun teksto ta duna impreshon ku tin sierto kondishon pa Spiritu Santu habitá un kreyente. Ún aparente kondishon ta obediensia. Echunan 5:32 ta bisa “*I nos ta testigu di e kosnan aki; i Spiritu Santu tambe, Kende Dios a duna na esnan ku ta obedes’E.*” Obediensia ta un kondishon pa Spiritu Santu habitá un persona? E kontesta ta tantu “si” i “nò”. Klaramente Spiritu Santu no ta habitá un persona *pasobra* e ta warda di Dies Mandamentunan. Tampoko un kreyente no ta risibí e habitashon di Spiritu *pasobra* e ta obedesé Palabra di Dios i ta bishitá iglesia òf dediká su mes na Señor. Nò! E kreyente ya kaba tin Spiritu Santu! Obediensia den e sintido ei no ta produsí e habitashon di Spiritu Santu. Ma di otro banda, e persona sin Kristu mester obedesé Dios Su instruksion pa kombertí i konfia den Kristu pa e por ta salbá (Echunan 6:7; Romanonan 1:5). Den Echunan 5, ripará ku Pedro tabata papia ku e Sanhedrin ku a rechasá Hesus komo nan Mesias. Pedro ta urgi nan pa obedesé dor di kere e bèrdat tokante Hesus komo Mesias. (Den Echunan 6:7, hopi saserdote a hasi presis esei, i “*tabata bira obedesido na e fe.*” Den e kaso aki “kere” i “obedesé” ta sinónimo (manera Romanonan 1:5; Hebreonan 5:9).

Algun ta propone un otro kondishon pa Spiritu Santu biba den un person: pidi. Lukas 11:13 por duna impreshon ku mester pidi pa haña Spiritu Santu. Manera nos a mira kaba, e persona sin Kristu mester pidi—e mester risibí e regalo gratis di pordon. Ma pa e persona ku ya kaba a konfia den Kristu, e tin Spiritu Santu kaba! Algun di e kantikanan ku nos ta kanta den nos iglesianan ta roga Spiritu Santu pa bin. En realidat, e doktrina di un kantika asina ta inkorekto, pasobra e persona ku a konfia den Kristu pa salbashon no mester pidi Spiritu Santu pa “bin!” E t’ei kaba. Solamente hende sin Kristu mester pidiE pa E bin! I esei ta sosodé dor di konfia den Kristu Hesus pa salbashon.

Un otro pregunta ta: Spiritu Santu ta habitá un kreyente temporalmente òf permanente? Den Tèstament Bieu, klaramente Spiritu Santu a wòrdu kitá di hende (1 Samuel 16:14; Salmo 51:11). Ma nos tin ku kòrda ku esaki a tuma lugá promé ku pentekostes, no despues. Despues di pentekostes, Spiritu Santu a bin biba den e kreyente i hamas a bai! Ademas, ta parse ku den kaso di Saul (ku 1 Samuel 16:14 i Salmo 51:11 tin na bista), Spiritu Santu tabata kun’è pa servisio...no pa salbashon (loke tambe tabata e kaso ku otro rei, profeta, saserdote, èts.)

E habitashon ta un evento despues di salbashon? Tin dos teksto den Echunan ku por duna e impreshon aki: 8:4-25 i 19:1-7. Nos ke mira e dos tekstonan aki ún pa ún.

Den Echunan 8:4-25, tabatin un tardansa promé ku e samaritanonan a risibí Spiritu Santu. Algun kristian ta tuma esaki komo evidencia ku e habitashon di Spiritu Santu ta kuminsá despues di salbashon i talbes ni ta pa tur kreyente. Otronan ta igualá e evento aki ku e yenamentu ku Spiritu Santu. Di bèrdat ningun di e splikashonnan ei ta kuadra.

E pregunta anto ta pakiko tabatin e tardansa? Talbes tin dos splikashon. Pa di promé a) e evento aki tabata diferente pasobra e samaritanonan tabata e promé grupo no-hudiu ku a wòrdu inkorporá den iglesia. Samaritanonan tabata mitar pagan i mitar hudiu. Relashoná ku esei, b) e religion samaritano i hudiu tabata rival. Dios tabata ke mustra tur kreyente (tantu hudiu komo samaritano) ku ta ún iglesia so tin—no un iglesia samaritano i un iglesia hudiu. E mihó manera pa mustra e kreyentenan samaritano ku nan ta pertenesé na ún solo iglesia (ku ta konsistí di tantu hudiunan komo paganonan uní den Kristu), tabata pa nan eksperensia un tardansa te ora e apòstelnan a presentá i e samaritanonan a risibí Spiritu Santu tambe.

E otro teksto, Echunanun 19:1-7, ta konta di diesdos disipel di Juan Boutista ku Pablo a enkontrá na Efeso. Nan no tabata “kristian”. Nan a kere e mensahe di Juan Boutista, ku e Mesias ta bin. Ma nan no tabata sa ku e Mesias a bin. Nan no tabata sa ku Hesus tabata e Mesias. Komo resultado, nan nunca a aseptá Hesus komo nan Mesias. Ora Pablo a prediká ku Hesus ta e Mesias, nan a konfia den Hesus, i mes ora a risibí Spiritu Santu.

Pues, ta un echu ku Spiritu Santu ta biba den e kreyente. Esaki no ta basá riba un emoshon. No ta importá si bo ta sinti ku Spiritu Santu ta biba den bo si òf nò! Esaki mester duna nos konfiansa den nos relashon pa ku Dios. E mester motivá nos pa praktiká e presensia di Dios. E mester hasi nos mas sensíbel pa ku piká...loke lo ofendé Spiritu Santu

Nos por bisa ku e habitashon di Spiritu Santu ta esensial pa otro ministerionan di

Spiritu por tuma lugá. Por ehèmpel, pasobra E ta habitá e kreyente, E ta siña i kapasitá e kreyente pa servisio. (Nos lo mira esaki despues.)

d. Seyamentu

Awendia nos ta firma tur klase di dokumento. Den tempunan antiguo, nan a usa un seyo personal pa indiká nan identidat riba un dokumento òf pa diferente okashon. Hopi hende tabatin un seyo personal na nan renchi òf un silinder kologá na garganta. Ora nan mester a “firma”, nan a primi e renchi òf lora e silinder den was moli pa e dibuho personal sali den e was, manera un stèmpel.

Dios tambe tin Su seyo personal ku kua E ta seya esun ku ta konfia den Hesu-Kristu na momentu di salbashon. “*Awor Esun ku ta stablesé nos huntu ku boso den Cristo i a ungi nos ta Dios, Kende tambe a seya nos i a duna nos e Spiritu den nos kurason komo garantia*” (2 Korintionan 1:21-22). Efesionan 1:13 ta bisa: “*Den djE boso a konfia tambe, despues di a tende e mensahe di bèrdad, e evangelio di boso salbashon; den Kende tambe, despues di a kere, boso a wòrdu seyá ku e Spiritu Santu di promesa.*” I segun Efesionan 4:30, “*I no hasi Spiritu Santu di Dios tristu, pa medio di Kende boso a wòrdu seyá pa e dia di redenshon.*”

Nota for di e tekstonan aki ku e Tata ta Esun ku ta seya (2 Korintionan 1:22). Spiritu Santu ta e seyo. Esnan ku ta wòrdu seya ta tur kreyente. E seyamentu ta sosodé na momentu di salbashon i e ta kontinuá pa semper. Efesionan 4:30 asta ta indiká ku si e kristian ta hasi Spiritu Santu tristu, tòg e ta keda seyá te dia di redenshon.

Kiko ta e proposito ku keredónan den Kristu ta wòrdu seyá? Un seyo tabata usá pa diferente proposito antes. Por ta ku algun di e siguijente ta motibunan ku Dios ta seya esun ku ta konfia den Kristu. Seguridat por ta un motibu. Seyamentu ta indiká seguridat ku e kreyente ta Dios Su poseshon i ku E lo preservá e kristian te dia di redenshon (Efesionan 4:30). Seyamentu tambe por indiká poseshon. Un seyo a indiká ken e doño ta. Kreyentenan ta seyá ku Spiritu Santu, indikando ku nan ta pertenesé na Dios. Un otro proposito pa un seyo tabata un garantia (2 Korintionan 1:22). Un “*garantia*” den e teksto aki ta e idea di un forskòt, òf, mihó bisá, plaka paga adelantá, ku ta garantisá ku mas sèn lo bin despues. Kristiannan tin e garantia ku nan lo gosa di tur Dios Su bendishonnan!

Pensa tambe tokante kon un persona ta risibí e seyamentu di Spiritu Santu. Esaki no ta un eksperensia ku e kreyente mester buska òf anhelá pa haña. E ta algu ku a sosodé kaba— for di momentu di salbashon. Efesionan 1:13 ta duna impreshon ku ta algu ku ta sosodé despues di salbashon: “*despues di a kere, boso a wòrdu seya*”. Ma esei no ta duna e impreshon korekto. Un mihó tradukshon lo ta: “*kereiendo den djE, boso a wòrdu seyá.*” E kerementu i seyamentu ta sosodé simultáneo. Pues, e seyamentu ta un echu ku e kristian mester aseptá pa medio di fe— méskos ku habitashon.

e. Testimonio

Tur hende ta nase den famia di diabel segun Juan 8:44 i 1 Juan 3:8. E persona ku ta kere den Kristu ta adoptá den famia di Dios (Juan 1:12; Romanonan 8:15-16). Ora e ta adoptá den famia divino, Dios ta pone Su Spiritu Santu den nos kurason. Spiritu Santu Su ministerio e ora ei ta pa testifiká, afirmá i sigurá e kreyente ku e ta un yu di Dios awor.

Esei ta e mensahe kla di Romanonan 8:15-16: “*Pasobra boso no a risibí un spiritu ku ta hasi boso esklabu di temor atrobe, ma boso a risibí e Spiritu di adopshon komo yunan, pa medio di kual nos ta sklama: ‘Abba, Tata!’ E Spiritu mes ta duna testimonio huntu ku nos spiritu ku nos ta yu di Dios.*” Ora bo tin duda komo un kreyente ku bo ta salbá, Spiritu Santu ta testifiká ketu ketu den bo kurason, “*Bo ta di Mi! Bo ta un yu di Dios! Bo ta salbá!*” Galationan 4:6 ta mustra dede den direkshon di e mésun obra di Spiritu Santu: “*...pasobra boso ta yu, Dios a manda e Spiritu di Su Yu den nos kurason, sklamando: ‘Abba! Tata!’*” Segun 1 Juan 4:13, “*Pa medio di esaki nos sa ku nos ta permanesé den djE i E den nos, pasobra El a duna nos di Su Spiritu.*” (Mira tambe Romanonan 8:23 i Efesionan 1:5).

Esaki ta un obra presioso di Spiritu Santu—dunando testimonio huntu ku nos

spiritu ku nos ta pertenesé n'E. E ministerio aki di Spiritu Santu ta kuminsá na momentu di salbashon i ta kontinuá bida largu!

E testimonio di Spiritu Santu ta mará firme na e seyamentu di Spiritu Santu, pero e tambe tin di hasi ku e echu ku e kreyente nobo ta adoptá den e famia di Dios. Nos ta definí adopshon komo e akto pa medio di kua esnan ku ta kere den Kristu ta bira un miembro di e famia di Dios.

Tambe ta bon pa mensioná un otro aspekto di Spiritu Santu Su testimonio... Su testimonio pa ku Kristu. Hesus a bisa "*Ora ku e Konsolador bin, Kende lo Mi manda serka boso for di e Tata, es desir e Spiritu di bèrdad, Kende ta sali for di e Tata, E lo duna testimonio di Mi*" (Juan 15:26). Tambe Juan 16:13-14 ta indiká ku Spiritu Santu ta testifiká di Hesus: "*Ma ora ku E, e Spiritu di bèrdad, bin, E lo guia boso den tur bèrdad; pasobra E lo no papia di Su mes, ma tur loke E tende, E lo papia; i loke tin di bin, E lo revelá na boso. E lo glorifiká Mi, pasobra E lo tuma for di loke ta di Mi, i lo revelá esaki na boso.*" Spiritu Santu no ta remplasá e Salbador. E no ta halsa Su mes riba nos Señor Hesu-Kristu. E ta bin pa glorifiká Esun ku a duna Su mes pa nos!

3. Despues di Salbashon

E obra di Spiritu Santu no ta kaba ora un persona konfia den Kristu Hesus pa salbashon. Alkontrario, esei ta solamente e komienso di Su obra den bida di esun ku ta kere den Kristu! Tin vários obra ku Spiritu Santu ta hasi den bida di e kreyente despues di salbashon.

a. Santifikashon

Esaki no ta un palabra komún. Kiko e ta nifiká? Santifikashon ta e obra soberano di Dios pa medio di kua E ta apartá un persona, lugá òf kos pa Su mes pa kumplí ku Su proposito. Maske tur tres miembro di e Trinidad tin parti den santifikashon, nos lo konsentrá riba e ròl di Spiritu Santu so.

Santifikashon tin afekto riba e kreyente pa ku pasado, presente i futuro. Den pasado—na momentu di salbashon—e kreyente a wòrdu hasí kompletamente i perfektamente santu, pasobra e ta den Kristu. Esei ta santifikashon posishonal. Esei ta un obra di Spiritu Santu. Segun 2 Tesalonisensenan 2:13, "*...Dios a skohe boso for di prinsipio pa salbashon pa medio di e obra di santifikashon dor di e Spiritu i fe den e bèrdad*". (Romanonan 15:16; 1 Korintionan 6:11; 1 Pedro 1:2). Klaramente, santifikashon ta un obra ku ta kuminsá na momentu di salbashon.

Ma santifikashon ta praktiko pa e kreyente awe, pasobra, maske e kreyente ya kaba ta santifiká posishonalmente, ainda su bida no ta tur santu ku por ta... e no ta 100% manera Kristu ainda. Spiritu Santu ta obra den e kreyente te dia ku e ta muri pa hasi esei un realidat. E tin ku siña someté na Spiritu Santu Su obra, pèrmitiendo E ta transformá su bida kada dia. Galationan 5:16 ta referí na e kresementu den santidat ku kada kreyente ta eksperensia: "*Ma mi ta bisa, kana segun e Spiritu, i boso lo no kumpli ku deseo di e karni.*" (2 Korintionan 3:18)

Dia ta bin ku e kristian lo ta den praktika loke e ta posishonalmente awor! Ma esei ta algu ku lo no sosodé te den futuro. Den eternidat, kreyentenan lo eksperensia santifikashon perfekto. Nos lo no tin ku lucha ku piká i tentashon nunca mas. Nos lo ta perfektamente santu meskos ku Kristu!

Tambe ta importante pa nota ku tin diferente foko relashoná ku santifikashon. Pa di promé, santifikashon ta referí na separashon for di loke ta malu. Santifikashon tambe ta un separashon pa ku loke ta bon. Un kòki tin kuchú den kushina ku e ta usa solamente pa preparashon di kuminda. E kuchú ei ta separá pa e bon propósito ei... un proposito positivo. Ma pa e kuchú ei por ta útil manera debe ser, e mester ta separá for di tur loke ta ahigieniko, sushi, bakteria, i tur loke ta perhudiká su proposito prinsipal. Esei ta separashon negativo... separashon for di loke ta malu.

Nos por nota Spiritu Santu Su obra den tur dos direkshon. Den e parti negativo, e kreyente ta morto pa ku piká. Segun Romanonan 8:13, "*...si boso ta biba segun e karni, boso*

mester muri; ma si dor di e Spiritu boso ta mata e obranan di e kurpa, boso lo biba.” (Galationan 5:16-17) Di e banda positivo, e kreyente ta separá pa ku loke ta bon pa e produsí santidat pa medio di e obra di Spiritu Santu. Galationan 5:22 ta bisa, *“Ma fruta di e Spiritu ta amor, goso, pas, pasenshi, kariño, bondat, fieldat, mansedumbre, dominio propio...”* (Romanonan 8:4; 2 Korintionan 3:18)

b. Yenamentu

Nos ya kaba a mira ku e persona tin ku *“nase di...Spiritu”* (Juan 3:5-8). Esaki ta referí na regenerashon. Ta pusibel pa nase di nobo sin eksperensia e yenamentu di Spiritu Santu! Nos tambe a mira ku Skritura ta laga sa ku kreyentenan ta *“batisá ku Spiritu Santu”* (Echunan 1:5). Esei a sosodé pa promé biaha na pentekostes, ora esnan ku a kere den Hesus a wòrdu batisá kolektivamente den e kurpa di Kristu. Awendia esei ta sosodé na momentu di salbashon (Galationan 3:27; Efesionan 4:5). Ma ta pusibel pa wòrdu batisá ku Spiritu Santu sin eksperensia e yenamentu di Spiritu Santu. Tambe nos a mira ku *“Spiritu..ta biba den boso”* (Romanonan 8:9-11,15). For di momentu di salbashon Spiritu Santu ta biba den e kreyente. Ma ta pusibel pa Spiritu Santu habitá e persona sin ku e ta eksperensia e yenamentu di Spiritu Santu!

Kiko anto ta e yenamentu ku Spiritu Santu? Efesionan 5:18 ta bisa, *“ma sea yená ku e Spiritu”*. Segun gramatika griego, esaki ta akshon presente kontinu. Un bon tradukshon di e teksto aki por ta, *“Sea seando (kontinuamente) yena ku Spiritu”* òf *“Sigui seando yená ku Spiritu”*. Un otro manera ku por ekspresá esaki ta, *“Laga e hábito di bo bida normal ta pa ta yená ku Spiritu.”* Tambe ta interesante pa nota ku e verbo *“sea yená”* ta den forma imperative. Den otro palabra, esaki ta un mandamentu.

Kiko “yen” ke men? Den Juan 12:3, Maria su unguento a yena e kas ku holo. Segun Juan 16:6, *“tristesia a yena..kurason”* di e disipelnan. Den Echunan 13:10, Elimas tabata *“yen di tur engaño i malisia”*. Nos por mira den Echunan 19:28 ku e efesionan tabata *“yena ku furia.”*

Kiko “yen” ke men den e kontekstonan ei? Nos ke pensa tokante un otro ehèmpel. Echunan 9:36 ta bisa ku *“Dorkas... tabata abundá (yen di) den echunan di karidat i bon obra”*. Kiko “yen” ke men eina? Nos por bisa ku echunanun di karidat i bon obra tabata visto i notabel den su bida, a karakterisá su bida, tabata prominente den su bida, tabata e kalidat ku a sobresalí i destaká riba tur otro kalidat den Dorkas su bida. Nos por bisa ku echunanun di karidat i bon obra a influensia henter su bida, ku nan tabata sinónimo ku Dorkas (ora bo a kòrda Dorkas, outomatikamente bo ta pensa di bon obra i limosna; “echunan di karidat i bon obra” tabata su fam!). Òf nos por bisa ku echunanun di karidat i bon obra a kontrolá henter su bida.

Laga nos apliká esaki na e palabra *“yena”* den Efesionan 5:18. Un hende yená ku Spiritu Santu ta un hende ku Spiritu Santu ta visto i notabel den su bida, ta karakterisá su bida, ta prominente den su bida, ta e kalidat ku ta sobresalí i destaká den su bida, ta influensia henter su bida, ta sinónimo ku su bida (ora kord’é, bo ta korda Dios). Ma talbes e idea prinsipal ta ku Spiritu Santu tin kontrol di henter su bida.

Tèstament Nobo ta papia di dos tipo di yenamentu. E promé tipo ta yenamentu kontinu. Esaki ta e estado normal ku Dios ke pa kada kreyente eksperensia. I esaki mester karakterisá un bida yená. E di dos tipo ta yenamentu spesial. Tin momentunan ku Spiritu Santu ta yena un persona pa un okashon spesial. Por ehèmpel, Pedro a wòrdu yena ku Spiritu pa algun okashon spesial. Maske Pedro a eksperensia e yenamentu ku Spiritu Santu desde Echunan 2:4, Pedro huntu ku Juan tabata yená ku Spiritu Santu ora nan a presentá dilanti sanhedrin (Echunan 4:8). Nan tambe tabata yená ku Spiritu Santu despues di wòrdu menasá pa sanhedrin (Echunan 4:31). Pues, nos por asumí ku Pedro tabata hiba un bida yena ku Spiritu Santu i ora e emergensia a presentá, el a wòrdu yená na un manera spesial. (Nos por nota e mesun patronchi den bida di Esteban (Echunan 6:3,5; 7:55) i Pablo (Echunan 9:17; 13:9).

E yenamentu kontinu ta loke Dios deseá pa kada kreyente! I e evidensia di e yenamentu aki lo ta un bida ku ta reflehá Kristu. (Galationan 5:22-23 ta mensioná e fruta di Spiritu—kalidatnan ku tabata presente den Hesus Su bida). Un otro evidensia ku un persona ta

yená ku Spiritu Santu ta relashonnan interpersonal korekto. (Efesionan 5:19-6:9 ta laga sa ku un esposa yená ku Spiritu Santu lo respetá su esposo. E esposo yená ku Spiritu Santu lo stima su esposa. Yunan yená lo obedesé nan mayornan, mientras mayornan yená ku Spiritu Santu lo trata yunan na un forma korekto. Ta meskos pa ku relashon di empleadonan i doñonan di trabou.). Un di tres evidencia di un bida yená ku Spiritu Santu ta poder den sirbishi (Echunan 1:8; 4:33). Dios lo tin oportunidat pa obra ku poder dor di bida di e persona kontrolá pa Spiritu Santu.

c. Ungimentu

Tin basta bruhashon tokante e ungementu ku Spiritu Santu. E propositonan pa e ungementu ta e kousa di e bruhashon. E ungementu tin di hasi ku dos proposito prinsipal.

Pa di promé, e ungementu su proposito ta pa sirbishi. Den Tèstament Bieu, nos ta haña tres klase di hende a wòrdu ungi: profetanan (1 Reinan 19:16), saserdotenan (Eksodo 28:41; 40:13-15) i reinan (1 Samuel 10:1; 16:12-13; 1 Reinan 1:39). E ungementu ku Spiritu Santu a ekipá e persona pa servisio (1 Samuel 10:1,9; Zakarias 4:1-14).

Na ki momentu nan a wòrdu ungi? Klaramente tabata na komienso di nan ministerio. Nan tabata konsagrá i prepará pa nan ministerio dor di e ungementu. Ta parse ku e ungementu di Spiritu Santu tin di hasi ku un preparashon spesial pa servisio spiritual.

Ta interesante ku Hesus tabatin tur tres puesto: a) Profeta (Echunan 3:22-23; 7:37-38); b) Saserdote (Hebreonan 5,7); i c) Rei (Mateo 2:2; 21:5; Juan 18:36,37). No tin duda ku Kristu tabata ungi ku Spiritu Santu (Lukas 4:18; Echunan 4:27; 10:38; Hebreonan 1:9). Di bèrdad, tantu “Mesias” [hebreo] komo “Kristu” [griego] ta nifiká ungi. Hesus a dependé totalmente riba Spiritu Santu pa Su ministerio. Kreyentenan den Kristu Hesus tambe ta reinan i saserdotenan huntu kun’E (1 Pedro 2:9; Revelashon 1:6).

Kiko di e ungementu despues di Pentekostes i awendia? E ungementu ku Spiritu Santu ta sosodé awendia? Segun 2 Korintionan 1:21-22, tur kreyente ta ungi for di momentu di salbashon: *“Awor Esun ku ta stablesé nos huntu ku boso den Cristo i a ungi nos ta Dios, Kende tambe a seya nos i a duna nos e Spiritu den nos kurson komo garantia.”* Ta parse ku pa medio di ungementu, e kristian ya kaba ta konsagrá pa sirbishi spiritual na momentu di salbashon. E ungementu ku Spiritu Santu ta esensial pa prepará e kreyente pa servisio. Pa medio di e preparashon aki, e kristian ta haña poder nesesario pa e ministerio. Nos no por sirbi Senór den nos mes forsa. Nos tin mester di e obra di Spiritu Santu!

E di dos proposito pa e ungementu ta pa siñansa i konosementu. Segun 1 Juan 2:20,27, Spiritu Santu ta aktivo di e forma aki awendia: *“Ma boso tin un unshon di Esun Santu, i boso tur sa. I pa loke ta boso, e unshon ku boso a risibí di djE ta permanesé den boso, i boso no tin mester di ningun hende pa siña boso; ma manera Su unshon ta siña boso tokante di tur kos, i ta bèrdadero i no ta un mentira, i meskos ku el a siña boso, boso permanesé den djE.”* Ta parse ku “unshon” ta referí na Spiritu Santu den e konteksto aki.

Siñadónan humano ta bon i asta nesesario. Ma ningun siñadó por remplasá Spiritu Santu. E kreyente tin mester di Spiritu Santu pa E siñ’é e bèrdatnan spiritual di Dios.

Nos mester evitá dos ekstremo riba e putno aki. Edukashon spiritual sin Spiritu Santu ta peligroso. Spiritu Santu ta Esun ku ta duna bida spiritual (Juan 6:63). Pues, intelektualismo—isolá for di Spiritu Santu—tin un afekto mortal tantu riba bo mes komo riba otronan. Ma e otro ekstremo tambe ta peligroso. Algun kristian ta yega na konklushon ku nan tin Spiritu Santu so i pues no ta nesesario pa studia Skritura. Tin predikadó ku ta di opinion ku Spiritu Santu lo duna nan e palabranan pa papia ora nan ta prediká i pues no tin mester di tuma tempu pa skudriná Skritura. E ungementu ku Spiritu Santu no ta ekskluí e nesidat di profundisá bo mes den Palabra di Dios. Beibel ta enkurashá studiamentu i meditashon di dia i anochi (Josué 1:8; Salmo 1:2; Echunan 17:11)

Nos a bisa ku e ungementu ku Spiritu Santu ta sosodé na kuminsamentu di e bida kristian, promé ku ministerio pa Señor ta kuminsá! En kontraste di Tèstament Bieu, unda algun kreyente so a wòrdu ungi, den Tèstament Nobo tur kreyente ta ungi. Ademas ta parse ku e ungementu ta algu ku ta tuma lugá ún biaha so...e no ta algu ku ta keda ripití.

d. Empoderá

Spiritu Santu ta duna poder pa diferente aspekto di bida kristian. Pa di promé, e kreyente tin mester pa Spiritu Santu empoder'é pa sirbishi kristian. Hesus a bisa Su disipelnan ku despues ku E ta bai, nan lo hasi obranan mas grandi ku El a hasi: “*Di bèrdat, di bèrdat, Mi ta bisa boso, esun ku kere den Mi, e obranan ku Mi ta hasi e tambe lo hasi; i obranan mas grandi ku esakinan e lo hasi, pasobra Mi ta bai serka e Tata*” (Juan 14:12). Esei ta pusibel solamente dor di Spiritu Santu ku Hesus lo manda pa nan.

Hesus tabata sa di e debilidad di kreyentenan pa ku testifikamentu. P’esei El a manda Spiritu Santu pa empoderá nan pa e tarea aki: “...*boso lo risibí poder ora Spiritu Santu bin riba boso, i boso lo ta Mi testigunan na Jerusalèm i na henter Judea i Samaria, i te na e parti mas alehá di mundu*” (Echunan 1:8). E kreyente no tin poder den su mes. Spiritu Santu ta Esun ku ta empoder’é pa testifiká. Hesus tambe a bisa den Lukas 24:48-49, “*Boso ta testigu di e kosnan aki. I mira, Mi ta manda e promesa di Mi Tata riba boso; ma boso mester keda den e stat Jerusalèm te ora boso wòrdu bistí ku poder for di ariba.*” Si Hesus a laga e disipelnan pa nan kuenta, nan lo a frakasá sigur sigur. Ma El a manda Spiritu Santu pa e proposito aki. (Mira tambe Echunan 5:32; 6:10; 1 Korintionan 2:4; 1 Tesalonisensenan 1:5.)

Di dos, e kreyente tin mester pa Spiritu Santu empoder’é pa viktoria kristian. Kreyentenan ta den un lucha: karni kontra Spiritu, Spiritu kontra karni. Ta Spiritu di Dios so ku por produsí viktoria kontra karni (Romanonan 8:13; Galationan 5:17; Zakarias 4:6).

Esaki tin di hasi ku santifikashon i yenamentu ku Spiritu Santu. Pasobra nos ya kaba a studia eseinan, nos lo no ripití esei aki. Ma ta interesante pa nota ku Romanonan 7 ta trata ku derota spiritual. Romanonan 8 ta trata ku viktoria spiritual. Kiko ta okashoná e diferensia? E foko di Romanonan 7 ta “ami” i “mi”—ignorando Spiritu Santu. En kontraste di Romanonan 7, kapítulo 8 ta mensioná Spiritu Santu rípitidamente. Spiritu Santu ta Esun ku por duna poder pa viktoria spiritual!

Spiritu Santu ta ungi e kreyente pa ministerio. Sinembargu Spiritu Santu no ta empoderá tur kreyente. Tin amplio ehèmpel di kristiannan ku—despues di añanan largu di preparashon, pa medio di sufrimentu, lucha, orashon, entréga di nan boluntad, èts.—ku Spiritu Santu a empoderá nan na un manera spesial. Moises a keda riba Seru Sinai, den komunion tan intimo ku Dios ku su kara a lombra (Eksodo 34:28-29; Deuteronomio 9:9,18). Ta parse ku Dios ta laga e kristian lucha den su bida spiritual i frakasá rípitidamente te ora ku e ta yega na e lugá den su bida ku e ta despuesto pa paga e preis i entregá su mes por kompleto na Dios. E ta pèrmití Spiritu Santu pa kontrolá su bida resultado den poder nobo i e ta produsí fruta den su bida dor di permanesé den Kristu (Juan 15:1-8).

e. Intersedé

Romanonan 8:26-27 ta bisa, “*I di e mesun manera e Spiritu tambe ta bin na yudansa di nos debilidad; pasobra nos no sa kon pa hasi orashon manera mester, ma e Spiritu mes ta interседé pa nos ku kehamentu ku no por wòrdu ekspresá, i Esun ku ta skudriñá e kurasonnan konosé e mente di e Spiritu, pasobra E ta interседé pa e santunan konforme e boluntad di Dios.*”

Nos no sa kon pa hasi orashon i tin mester di yudansa divino. Pakiko? Nos tin mester di yudansa pasobra 1) nos tin tendensia pa buska nos propio interes den orashon. Spiritu Santu tin ku siña nos pa buska interes di Dios i di otronan. 2) Kristiannan ta falta komprendementu den orashon. Tin biaha ku nos no sa kiko ta boluntad di Dios—i nos orashonnan por kontradisí Dios Su boluntad. Nos tin mester di Spiritu Santu Su obra pa ku nos orashonnan pasobra 3) nos por ta friu den orashon. Kuantu biaha nos ta hasi orashon djis pasobra ta un habito òf deber. Nos ta falta fervensia den orashon. Pablo a skirbi tokante “*lucha huntu...den boso orashon*” (Romanonan 15:30). Esei ta algu kompletamente otro for di orashon sn fervensia. Tambe 4) nos ta falta persistensia den orashon. (Efesionan 6:18; Lukas 18:1-7). I si tur e promé kuater punto ta bèrdat, ta sigur ku nos tin mester di Spiritu Santu Su yudansa den

nos orashon, pasobra 5) nos ta falta poder i fe den orashon

Kuater biaha den Juan 14-16, Hesus ta yama Spiritu Santu e “*Konsolador*” (14:16,26; 15:26; 16:7). E palabra griego, PARAKLETOS, ta nifiká un persona ku ta yamá na banda di un otro persona (pa konsolá, yuda, konsehá, èts.). Spiritu Santu tin ministerio pa konsolá, yuda (Filipensenan 1:19), duna speransa (Romanonan 15:13), anima, konsehá, enkurashá, èts. e kreyente.

g. Guia

Ken Spiritu Santu ta guia? Segun Romanonan 8:14, tur esnan ku ta yunan di Dios por haña e guiansa di Spiritu Santu. (Galationan 5:18) Spiritu Santu no ta—no por—guia esnan ku ta sin Kristu.

Nos por mira diferente ehèmpel di Spiritu Santu Su guiansa den e buki di Echunan. Den Echunan 8:27-29, Spiritu Santu a guia Felipe pa kamna banda di e wagen di e ofisial di palasio di Etiopia. Segun Echunan 10:19-20, Spiritu Santu a instruí Pedro pa bai huntu ku e mensaheronan ku Cornelio a manda. Nos por mira den Echunan 13:2-4 ku Spiritu Santu a apuntá ken iglesia di Antiokia mester a manda komo mishonero. Den Echunan 15:28, e apòstelnan ta laga sa ku nan ta uní ku Spiritu Santu den un desishon. Spiritu Santu a guia Pablo unda e mester bai kompartí Palabra di Dios (Echunan 16:6-7). I segun Echunan 20:22-23, Spiritu Santu a guia Pablo pa bai Herusalèm maske esei lo enserá sufrimentu p’è.

Un pregunta praktiko ta kon Spiritu Santu ta guia? Sigur Skritura ta e manera prinsipal ku E ta guia. Nunka Spiritu Santu Su guiansa lo kontradisí Skritura Santu. E tambe ta guia dor di orashon. Spiritu Santu por usa konseho di kreyentenan maduro. Sirkunstansianan por ta un indikashon. Den Echunan 16:6-7, algun porta a habri mientras otro porta a sera, dunando indikashon unda pa bai. Nos no por tuma sinkunstansia komo un indikashon infalibel, ma kombiná ku otro maneranan, sigur esaki tambe por ta un yudansa. I tambe, Dios ke pa nos usa nos selebre santifiká. Nos por evaluá e situashon i dedusí den ki direkshon Dios ta guia. E no ta duna nos un kabes djis pa prònk!

h. Instruí

Segun Juan 14:26 i 16:12-15, Spiritu Santu ta instruí e kreyente. Den e tekstonan aki, ta parse ku Hesus a dirigí Su palabranan spesífikamente na e apòstelnan ku E mes a skohe. Nan tabatin mester di Spiritu Santu pa “...*siña boso tur kos i hasi boso rekòrdá loke Mi a bisa boso*” (14:26) i “...*tuma for di loke ta di Mi i lo revelá esaki na boso*” (16:15), pasobra nan tabata esnan ku lo skirbi Tèstament Nobo bou di inspirashon di Spiritu Santu.

Algun kristian ta kere ku nos tin mester i por haña revelashon spesial òf místiko awendia ainda. Esei no ta e kaso. Spiritu Santu a inspirá sierto apòstel pa skirbi Su Palabra i a duna revelashon spesial na nan. Ma awendia, nos tin Dios Su Palabra kompleto, Beibel. Spiritu Santu no ta duna informashon spesial mas riba nivel di Skritura.

Ma den un otro sintido (ku nos a mira kaba), nos tin mester di Spiritu Santu pa E instruí nos ora nos ta lesa, studia i meditá den Su Palabra (1 Juan 2:20,27; 1 Korintionan 2:14-16). Pasobra Spiritu Santu ta Esun ku ta Outor divino di Skritura, E tin abilidadat pa pa iluminá mente di hende pa komprendé Skritura (1 Korintionan 2:13).

i. Fruta di Spiritu

Galationan 5:22-23: “*Ma fruta di e Spiritu ta amor, goso, pas, pasenshi, kariño, bondat, fieltat, mansedumbre, dominio propio...*” E fruta di Spiritu ta kalidatnan ku Spiritu Santu so por produsí den bida di e kreyente. Ora e kristian ta permanesé den Kristu, E ta produsí e fruta den su bida

Nuebe “*fruta*” ta aparesé den e lista aki. Ma pasobra e palabra “*fruta*” ta usá na un forma sigurlar aki (e teksto no ta bisa “*frutanan di e Spiritu*”), tin diferent pensamentu entre studiantenan di Beibel. Algun ta pensa ku tur nuebe kalidat ta forma ún solo fruta i ku e ún fruta ta refelhá den diferente manera. Otronan ta di opinion ku e “*fruta di Spiritu ta amor*”—

stimashon ta e fruta singular. I kiko di e otro ocho kalidatnan? Segun e perspectiva aki, e kalidatnan ei simpelmente ta deskribí e fruta prinsipal, stimashon.

j. **Donnan spiritual**

Tin kristian ku ta bruha “fruta di Spiritu” ku “donnan spiritual”. Un don spiritual ta un abilidad ku Dios ta duna e kreyente pa sirbi’E. Esaki ta algu mas ku un talento òf abilidad natural ku un persona ta nase kuné òf ta desaroyá. Esaki ta un abilidad ku Spiritu Santu ta duna na kada kreyente na momentu di salbashon. Segun 1 Korintionan 12:11, Spiritu Santu ta duna donan spiritual “...na kada un en partikular manera E kier.” (Mira tambe 1 Pedro 4:10.)

Romanonan 12:4-8, 1 Korintionan 12:7-11,28-30, i Efesionan 4:11 ta lista e diferente donnan. E kantidat di don spiritual ta varia segun kada outor. Ma e donnan listá den Romanonan 12:4-8 ta aseptá pa mayoria studiante di Beibel.

Ta parse ku no tur don ta pa tur era. E teksto, 1 Korintionan 13:8-10, ta usá pa argumenta ku donnan milagroso a wòrdu suspendé: “...pa loke ta donnan di profesia, nan lo wòrdu kitá, pa loke ta lenganan, esenan lo stòp; pa loke ta konosementu, esei lo wòrdu kitá. Pasobra nos ta komprendé pa un parti, i nos ta profetisá pa un parti; ma ora loke ta perfekto bin, loke ta pa un parti lo wòrdu kitá.” Otronan ta haña ku e teksto aki no ta indiká esei.

(Pa un estudio mas profundo tokante suspenshon di donnan milagroso, mira e dokumento entitulá *Argumentonan Pro Suspenshon*.)

Efesionan 4:11 i 2:20 ta papia tokante personanan ku Kristu a duna na iglesia. Dios a duna 12 apòstel i profetanan pa establese iglesia. Klaramente e 12 apòstelnan no ta na bida mas. No tin ningun hende na bida awendia ku nos por bisa a remplasá asta ún di e 12 apòstelnan original. E 12 apòstelnan tabata un grupo spesial ku a funshoná pa un periodo kortiku pa establese iglesia i despues a fayesé. Ma di otro banda, e palabra griegu, “apòstel”, ta nifiká un persona ku a wòrdu mandá. Den e sintido ei si apòstelnan ta eksistí. Nos konosé nan komo mishoneronan—hende mandá pa proklamá e mesahe di salbashon pa medio di Hesu-Kristu

Maske Spiritu Santu ta duna e donnan manera E ta haña ta bon, kada don mester wòrdu desaroyá. Ningun kreyente ta haña un don kompletamente desaroyá. Esei ta sosodé dor di hasi uso di e don pa un periodo di tempu.

Kuantu don un kreyente ta haña na momentu di salbashon? Beibel no ta indiká esei. Talbes Spiritu Santu ta duna un don manera un pakete—ku diferente don den un pakete.

Un otro opservashon ta ku nos no sa sigur si e donnan listá den e tekstonan mensioná ta e úniko donan ku ta eksistí. Talbes por tin mas don. Ma nos mester ta kouteloso ku esaki pasobra Beibel no ta lista mas don. Por ehèmpel, tin ora un kristian ta bisa ku e tin e don di músika. Talbes e tin rason. Ma Skritura simpelmente no ta bisa ku músika ta un don spiritual.

C. OBRANAN DI SPIRITU SANTU DEN FUTURO

Kon Spiritu Santu lo obra den futuro? Su ministerio lo ta diferente despues di e era di iglesia...despues di e rapto? Talbes Skritura ta duna nos algun indikashon di Su obra durante diferente evento ku Beibel ta profetisá pa ku futuro.

1. **Durante Tribulashon**

Den 2 Tesalonisensenan 2:3-4, Pablo a laga sa tokante e anti-kristu ku lo bin: “No laga ni un hende gaña boso di ningun manera, pasobra e dia ei lo no bin promé ku e kaimentu for di fe yega i e hòMBER di piká keda manifestá, e yu di pèrdishon, kende ta oponé i ta halsa su mes riba tur loke ta wòrdu yamá Dios òf opheto di adorashon, asina ku e ta tuma asiento den e tèmpel di Dios, proklamando su mes komo Dios.” Despues e ta kontinuá indikando kiko ta prevení e eventonan aki di sosodé. “Boso no ta kòrda ku mientras mi tabata serka boso ainda, mi tabata konta boso e kosnan aki? I boso sa kiko ta strob’é awor, pa na su tempu e wòrdu manifestá. Pasobra e misterio di inikidat ta obrando kaba; solamente esun ku ta stroba awor lo sigui hasi asina te ora ku e wòrdu kitá for di kaminda. I e ora ei e malbado ei lo wòrdu manifestá, kende Señor lo destruí ku e rosea di Su boka i kaba kuné ku e resplandor di Su

binida...” (2:5-8).

E pregunta ku studiantenan di Beibel ta hasi ta kiko òf ken ta “*esun ku ta strob’é... esun ku ta strobe awor*” (es ta e anti-kristu) den 2:6-7? Tin diferente interpretashon di esaki. (No ta nos proposito aki pa splika òf defendé e interpretannan. Kada interpretashon tin su problema.)

Algun ta bisa ku lei i òrdu ta stroba “*e malbado*” di aparesé. Otronan ta haña ku esaki ta gobièrno—promotor di leinan i òrdu—ta prevení e anti-kristu di bin. Tin studiante ku ta pensa ku esaki ta referí na kristiannan. Pasobra iglesia ta konsenshi di mundu, ora e rapto ta sosodé i iglesia ta saká for di mundu, e ora ei maldat lo kuminsá reina i e anti-kristu lo wòrdu revelá.

Nos ta trese esaki dilanti pasobra tin un otro interpretashon ku e teksto aki ta papia di Spiritu Santu. Segun e pensamentu aki, inmediatamente despues ku e rapto ta sosodé, ni ún kreyente lo no ta na bida den e mundu aki i Spiritu Santu tambe lo ta kitá na kuminsamentu di tempu di tribulashon.

Meskos ku e otro splikashonnan, nos tin problema ku e interpretashon aki. Ta parse ku Spiritu Santu lo ta presente i aktivo durante tempu di tribulashon, pasobra hende lo wòrdu salbá durante e shete aña di tribulashon. (Revelashon 7:14; 20:4). Di bèrdat ta parse ku bastante hende lo konfia den Kristu komo Salbador durante e periodo ei. Kon ta pusibel ku nan por ta salbá sin e obra di Spiritu Santu? (Zakarias 12:10; Joel 2:28-32)

2. Durante Milenio

Talbes un otro teksto ta papia tokante Spiritu Santu Su obra despues di e tribulashon ...durante e periodo di mil aña ku Hesus ta reina. Segun algun teólogo, Isaias 11:1-3 ta deskribí Esun ku lo reina durante milenio: “*Anto un Spreit lo sali for di e tronkon di Isai, i un Rama for di su raisnan lo karga fruta. E Spiritu di SEÑOR lo keda riba djE, e Spiritu di sabiduria i komprendementu, e Spiritu di konseho i poder, e Spiritu di konosementu i temor di SEÑOR. I E lo tin delisia den e temor di SEÑOR, i E lo no huzga segun loke Su wowo ta mira, ni hasi desishon segun loke Su orea ta tende...*” Kisas esaki ta deskribí Spiritu Santu Su obra durante milenio.